



## Universitätsbibliothek Paderborn

**Vita Ioannis Berchmanni Flandro-Belgæ Religiosi  
Societatis Iesv**

**Cepari, Virgilio**

**Antverpiæ, 1630**

Collectio variarum rerum spiritualium à Ioanne dd sui vtilitatem Latinè  
conscriptarum, quæ vsui esse possunt etiam alijs.

[urn:nbn:de:hbz:466:1-46083](#)

COLLECTIO  
VARIARVM RERVM  
SPIRITUALIVM

A

IOANNE BERCHMANNO

AD SVI VSTITATEM  
LATINE CONSCRIPTARVM,

QVÆ

VSVI ESSE POSSVNT  
ET IAM ALII S.

*Oratio quam solitus erat recitare Ioannes,  
& vocabat eam Orationem Congrega-  
tionis.*

**S**ANCTA Maria , Mater Dei,  
& Virgo , ego N. te hodie in  
Dominam , Patronam , & Ad-  
uocatam eligo , firmiterque  
statuo ac propono , me num-  
quam te derelictum , neque contra te ali-  
quid vñquam dicturum aut facturum , ne-  
P que

que permissurum vt à meis subditis aliquid contra tuum honorem vñquam agatur. Obsecro te igitur , suscipe me in seruum perpetuum , adfis mihi in omnibus actionibus meis , nec me deseras in horâ mortis meæ. Amen.

*Diarium , quod sibi Joannes in Novitiatu collegit , ac seruandum conscripsit in Belgio.*

**P**O S T Crucis signum, primò cum magno affectu Christum Dominum in cruce cruentum in brachijs meis fingam , & supra me B. Trinitatem: tum cogitabo, Deus Deus meus, ad te de luce vigilo : tum Deo Patri offeram Filium in gratiarum actionem pro omnibus beneficijs , & nominatim, quòd me hac nocte à peccato , morte subitaneâ seruavit , & iam iterùm concedat mihi gerere vestem Societatis: petam perseverantiam per B. Virginem , Angelum , B. Patrem , Patronum menstruum , & omnes Sanctos , &c. in fine Pater , Ave , tria oscula terræ , Credo, Anima Christi.

**A**nte opus. Intentio. O Deus meus, & omnia, cui omnes creaturæ seruiunt, gratias ago diuinæ bonitati tuæ , quòd me usque in hanc horam conseruare dignatus sis ; & propono per

per gratiam tuam hoc opus , & omnes reliquias huius diei & totius vitæ actiones facere ad nominis solius tui gloriam, ut tibi maxime placeam, & B. Virginem, Patronosque meos, Angelumque Custodem lætificem , & nominatum illum quem hodie colo : & protestor me nullam præter hanc ab hostibus suggestam admittere temptationem.

Post opus. O beata Trinitas, offero diuinæ Maiestati tuæ hoc opus , vltimum fortè coram curiâ tuâ , nunc cum lacrymis Christi, nunc cum doloribus , nunc cum vulnere dexter lateris, nunc cum vinculis, nunc cum meritis B. Virginis, cum sanguine Martyrum nostræ Societatis, cum charitate, laudibus Angelorum. Meditatio secundum Additio-  
nes B. Patris nostri. Ante exhortationem, vel lectionem spiritualem. Pura intentio, & sequens oratio: Aperi Domine aures & oculos , &c. Post eam: Cōfirma hoc Deus quod operatus es in nobis, scio hanc esse voluntatem tuam.

Recollectio horaria. O crux, &c. tu aue. O bone I E S V, tu pro me flagellatus es, quid retribuam tibi pro tantis doloribus ? Fecine mea purâ intentione, in præsentia Dei, & frequenter ? De examine particulari. Ignosce Domine, & adiuua me, ut melius sequentem horam possim transfigere: quod faciam sic & sic. Examen ad pulsum. Quis stabit. Ne in-

tres, &c. In loco. Coram Deo me statuam, Angelo & diabolo, iudicandum quasi, &c. Reliqua more solito. Post examē proponam primō, Diarium seruare, puram intentionem, præsentiam Dei, & proposita meditationis. Ad mensam, Primō, Intentio, attentio in benedictione, & gratijs, & obseruatio Regulærum de victù B. Patris. Recreatio. Primō, Pura intentio, propositum loquendi in præsentia Dei de pijs rebus. Post, Petitione veniæ de defectibus, & oblatio,

Modus incumbendi post examen. Dispositio meditationis breuis, tum flexis genibus recitare catalogum beneficiorum, cum Symbolo, formulâ votorum. Exuendo me, honestas seruanda, cum consideratione breui detractionum vestium ante crucem. Aperiendo lectum, & ascendendo. En vita incertus, & æternæ salutis, intro sepulchrum. Utinam te numquam offendisse! Doleo ex animo Redemptor mi, & propono sinceram emendationem. O Pater æterne, offero tibi Filium tuum cum omnibus doloribus & vulneribus eius pro omnibus peccatis & negligentijs meis. O Beata Virgo adiuua me, o vos omnes sancti Patroni, suscipite me. Angele mi, custodi me ab omni peccato & insidijs diaboli, in nomine Patris, & Filij, & Spiritus sancti. Amen. Tum per Aue de horâ surgendi cogitabo,

bo, obdormiam autem in cōsideratione meditationis. Communio. Cōpositio loci. Stature cum omnibus Patronis, Angelis, &c. in monte Caluariæ, & vide Christum Dominum baiulantem crucem suam sanguineam, &c. & à Iudeis impelli. Supra te Deum Patrem iratum considera vsque ad eleuationem, quid ibi agatur. Deponit crucem, offeritur myrrha ad bibendum, detrahuntur vestes, aptantur instrumenta, in crucem conicitur nudus, dexteram porrigit, obediens tortoribus, tum sinistram, & pedes terebrandos, & perforandos clavis. Aspice Christum tollentem oculos, offerre se Deo Patri pro peccatis tuis, & alloquere magno cum affectu usque ad eleuationem. In eleuatione vide eleuari crucem, & Christum pro inimicis orantem audi: quod (vt ipse Ioannes fassus) in eleuatione obseruabat semper. Tum vide quomodo ex tōto corpore sanguis fluat, & vulnera aspice. Ad caput ora pro Superioribus Ecclesiasticis, & sacerdotalibus: per coronam, per dexteram, pro parentibus, fratribus spiritualibus in genere, & particulari, pro corporalibus, & benefactoribus, & amicis: ad sinistram pro inimicis, & quos ego, vel qui me contrastauerunt, iniurijs affecerunt, vel Societatem. Ad latus, pro me ipso primò, vt possum Deum ex toto corde diligere: secundò, vt

P 3 ardere

ardere possim: zelo salutis proximi: tertio, ut  
perseuerare in Societate possim: quartò, ut tria  
vota benè obseruare: quintò, ut magnum ge-  
ram affectum erga B. Virginem, & venerabile  
Sacramentum. Ad pedes pro Societate, &  
omnibus religiosis bonis & malis, & pro se-  
cularibus bonis & malis. In Communione,  
vide quomodo B. Virgo cum Angelis & Pa-  
tronis tuis deferat Christum ad te ad sepe-  
liendum in corde tuo, & magnâ cum humi-  
litate & charitate eum suscipe; tum fidem  
excita, gratias age, offer hospitem, & hospi-  
tete, propone.

*Alius modus à nativitate sumptus.*

Egrediente Sacerdote, cogita egredi  
B. Virginem à Nazareth in Bethleem cum  
sancto Iosepho, & comitare per iter difficile  
usque ad Euangelij recitationem. Ad Credo  
fidem excita de I E s v. Ad Offertorium vide  
B. Virginem mendicantem hospitium: ob-  
stupesce, & cor tuum offer. Vide posteà quo  
modo diuertat in stabulum cum gaudio: vide  
Angelos exspectantes eum. In eleuatione  
aspice natum quasi puerulum I E s v M: ado-  
ra, fidei, spei, & charitatis actu: mirare sum-  
mam eius paupertatem, usque ad Commu-  
nionem: statue te ad Præsepe cum B. Virgine,  
& ab eâ veniam pete, ponendi Iesulum in  
lectulo

lectulo cordis tui, tum apprehende illum,  
amplectere magno cum affectu, offer Deo  
Patri, gratias age, pete, & tene eum, Domi-  
ne non dimittam te, nisi dederis mihi hoc  
& hoc.

Inter vescendum imaginare quasi videas  
Christum Dominum vescentem cum suis  
discipulis, obseruando quem modum teneat,  
& imitare: vel cogita fel Christi, vel te habe-  
re Christum recens natum in corde tuo, ibi-  
que petere lac à te, educa illum, relinquendo  
illi optima.

*Alia quedam ab eodem Ioanne Berchmanno  
Romæ conscripta.*

*Incitamenta ad orandum.*

**M**OTIVVM primum: Si benè facio ora-  
tionem meam, non erit ullum pericu-  
lum amittendæ vocationis meæ; omnis e-  
nim apostasia à Societate hinc sumit initium.

Secundum: Maxima sollicitudo Societa-  
tis de oratione: ideò enim datur quadrans  
vesperi, visitantur omnes, &c.

Tertium: Qui benè facit orationem, ha-  
bebit cælum hīc propter abundantiam con-  
solationum, & posteā.

Quia autem oratio penderet vel maximè à  
modo manè surgendi, ideò priùs hīc traden-

P 4 da

da videtur ratio benè transfigendi medium illam horam , quæ præcedit orationem , qui modus erit præparatio ad illam.

*Modus benè transfigendi medium primam horam matutinam.*

**A**d pulsū cogitabo me vocari à Deo , & munies me signo sanctæ Crucis , dicam , *Domine quid me vis facere ? paratum cor meum Deus , paratum cor meum.* Tum exclusâ omni aliâ cogitatione percurram puncta meditationis , & simul aliquam similitudinem , quæ faciat ad meditationem tuam , eo modo quo B. P. IGNATIVS docet faciendum in Additionibus pro primo & secundo exercitio primæ hebdomadæ . Similitudo communis ad omnem meditationem esse poterit hæc , considerare Christum in solio sedere , circumstantibus Patronis tuis eo modo , quo solet Summus Pontifex , cùm celebrat solemniter , & excita te ad reuerentiam & deuotionem , vel excita aliquem affectum .

Hoc solum adde , quando accipis sotanam , antequam induas illam , osculare eam , gaudendo in animo tuo , quod adhuc hodie Christi insignia gestare possis . statim ubi descendero , lectus operiendus .

Cùm eris vestitus , flectes genua , & facto signo

signo Crucis, gratias ages Angelo tuo Custodi, & Patrono præcedentis diei, verbi gratiâ S. IGNATI, pro custodiâ tui die præcedenti, & præcipue hac nocte, petendo ab illis, vt tota reliquo vitæ tuæ tempore, & præsertim in horâ mortis adesse velint.

Deinde eliges tibi Patronum præsentis diei, verbi gratiâ S. Franciscum Xauerium: & cùm petieris ab illo, vt idem dignetur facere quod alter Patronus, offeres per manus illius has Preces ut primitias istius diei: primò, Symbolum Apostolorum, protestando te velle esse verum filium sanctæ Catholicæ Apostolicæ Ecclesiæ Romanæ: secundò, Orationem Sodalitatis, protestando te velle esse verum filium B. Virginis: tertiò, formulam Votorum, protestando te velle esse verum filium Societatis.

Deinde proponam hæc tria: primò, quidquid hodie cogitaturus, dicturus, facturus sum, erit purè ad gloriam Dei, in gratiarum actionem pro beneficio Communionis; vel si media pars hebdomadæ elapsa sit, vt bene possim communicare; & demum, vt possim impetrare, verbi gratiâ, verum affectum erga B. Virginem, & veram internam humilitatem, & uniam cum cogitationibus, verbis, & actionibus Christi Domini: secundò proponam attendere virtuti, vel vitio examinis par-

P 51                   ticu-

ticularis: tertio, nullum per Dei gratiam facere peccatum veniale ex intentione, aut minimam transgressorum Regulam, vel ordinationem: quartò, viuere & mori in Societate. Reliquo ante orationem tempore componam omnia mea in cubiculo, primò letum, deinde reliqua, purgandum caput, & vestes, &c. Inter componendum ordinabo totam meditationem meam. Primò faciam hoc, deinde faciam illud, &c. & si tempus suppetat, faciam aliquas aspirationes, verbi gratiâ, *Domine doce me orare. Domine, in meditatione meâ exardescat ignis. Domine, aperila bia cordis mei, & cor meum annuntiabit laudem tuam.* Immediate ante orationem cogitabo quò sim iturus, nempe ad Deum; quid facturus, nempe cum illo locuturus.

### *Meditatio.*

**A**CCIPE aquam lustralem. Ad pulsum fac signum sanctæ Crucis, dista à loco orationis uno vel gemino passu, & per spatium Orationis Dominicæ eleuato animo cogita Christum præsentem, & spectantem exhibe illi cum humili gestu reuerentiam, accede ad locum, & genuflexus pete, ut omnes vires & operationes tuæ tendant sincerè ad cultum eius, & gloriam. Tum tria præludia,

narr-

narratio historiæ , compositio loci , & petitio  
gratiæ , vel certè duo ; tum exercitium memo-  
riæ , intellectus , & maximè voluntatis ; tum  
colloquium , in quo maior reuerentia requi-  
ritur , quām in discursu . Demum Pater no-  
ster , ac deinde cum reuerentiâ vsque ad ter-  
ram , surgendum . Post orationem , breuis fle-  
xio , si bene , gratiæ agendæ ; si male successit ,  
cum pœnitudine causæ inquirendæ . Ultimò  
notanda , primò successus , secundò proposi-  
tum , tertio motuum .

*Missa Sacrificium.*

INTER eundum cogita quò eas , nempe ad  
Deum ; & quid facturus , nempe oblatus  
Filium suum . In loco , pete gratiam , renoua  
intentionem manè factam , nempe ad glo-  
riam Dei ; in gratiarum actionem pro Com-  
munione , vel præparationem ad illam , & vt  
impetres hoc , vel illud . Vni demum hoc  
Sacrificium incruentum cum illo incruento  
in arâ Crucis oblato , & actionem illam tuam  
cum ipso Sacrificio . Ab initio vsque ad obla-  
tionem attende verba , ad illud quod agitur .  
Ab oblatione , incipiam percurrere passio-  
nem Christi , inchoando ab oratione in hor-  
to , ita vt dum dicitur *Sanctus* , eò peruenierim ,  
vbi Christus prosternens se in Cruce , à torto-  
ribus

ribus clavis illi affigitur. Hic animo ad Deum  
Patrem eleuato, inuitabo illum, *Aspice Do-*  
*mine in faciem Christi tui, & per caput eius spi-*  
*nis coronatum, orabo primò pro Summo*  
*Pontifice, Imperatore, Regibus, Principibus*  
*Christianis, & petam det illis gratiam bene*  
*gubernandi, & defendendi Ecclesiam suam:*  
*secundò per idem caput pro R. P. N. Gene-*  
*rali, Prouinciali, Rectore, Ministro, Patre spi-*  
*rituali, Præceptoribus, &c. Per manum de-*  
*xteram pro amicis carnalibus, det illis gra-*  
*tiam obseruandi præcepta sua, tum pro spi-*  
*tualibus, commendando primò omnes qui*  
*in eodem Collegio mecum habitant, & pro*  
*quibusuis nominatim, petendo pro illis hæc*  
*tria: primò Angelicam castitatem, &c. secun-*  
*dò, sint bonum instrumentum Societatis:*  
*tertiò, perseuerantiam in vocatione. Per ma-*  
*num sinistram pro omnibus inimicis meis,*  
*hæreticis, gentilibus, & existentibus in pec-*  
*cato mortali. Per pedem dexterum pro om-*  
*nibus illis, qui liberiùs & dissolutiùs viunt*  
*in Societate, ut eorum imperfectiones non*  
*impediant fructum Societatis. Per pedem si-*  
*nistrum pro omnibus apostatis factis, ut illo-*  
*rum Deus dignetur misereri. Ad eleua-*  
*nem imaginabor mihi verā in Cruce crue-*  
*tati corporis eleuationem, & dicam: *Adoro**  
**te Christe, & benedico tibi, quia per sanctam**

Cry.

Crucem tuam redemisti mundum. Et ulterius,  
Anima Christi. Ad Nobis quoque peccatoribus,  
cogitabo de Vulnera lateris, & statim petam  
a Christo, ut dignetur in illo abscondere So-  
ciatem suam, & ut illam conseruet, defen-  
dat, & augeat; secundò, commendabo defun-  
ctos parentes, & amicos meos carnales, de-  
functos Societatis, & illos defunctos, pro qui-  
bus pauci orant, & qui precibus maximè in-  
digent: tertio, ut me in illo abscondat, & der-  
mihi veram charitatem, latitudinem spiritua-  
lem, sanctitatem, doctrinam (si sit maior glo-  
ria eius) Angelicam castitatem, faciat me bo-  
num ministrum Societatis; & perseveran-  
tiam in vocatione, affectum erga B. Virgi-  
nem, & virtutem examinis particularis, verbi  
gratiā, charitatem, vel veram internam hu-  
militatem. Communicabo spiritualiter, &  
reliquo tempore attende ad verba Sacerdo-  
tis, & cum illo gratias age. Post Sacrum pri-  
mò dole, secundò gratias age, tertio vni actionem  
tuam cum Sacrificio. Dic *Magnificat*  
pro indulgentiā omnium defectuum.

### Communio.

INTER eundum cogitabo quid sim factu-  
rus, nempe sumpturus verè carnem & san-  
guinem Filij Dei, & filij beatæ Virginis. Inui-  
tabo

tabo Aduocatos meos , vt præparent illi cor  
meum. In loco pete gratiam , renoua inten-  
tionem manè factam. Tum paululùm cogi-  
ta miseras , peccata , & imperfectiones tuas;  
dole primò de omni peccato commisso , &  
propone sinceram emendationem. Ab obla-  
tione vsque ad *Sanctus* , recitabo aliquam  
orationem vocalem deuotam. tum vsque ad  
eleuationem percurram totam passionem  
**Christi**. Sub eleuatione cogitabo eumdem il-  
lum Christum de cælo in altare descendere;  
idque vt paulò pòst animam meam ingre-  
diatur, adorabo illum, recitando, *Tu Rex glo-  
riæ Christe, cum sancto Thòmâ, vsque ad Sal-  
uum fac, &c.* Tum persistam in actibus fidei  
& charitatis, vsque ad Pater noster. Hic inci-  
piam aspirare ad Christum , dicendo: *Quis  
mihi det te fratrem meum fugentem ubera ma-  
tris meæ? &c.* *Quemadmodum desiderat ceruus  
ad fontem aquarum, &c.* *Sit iuit anima mea ad  
Deum fortem viuum, &c.* *Veniat dilectus meus  
in hortum suum, &c.* Offeram hæc desideria  
Christo per B. Virginem , & cogitabo illum  
respondere: *Ego veniam, & curabo eum.* & di-  
cam humiliter : *Domine non sum dignus, &c.*  
*In manus tuas Domine commendô spiritum  
meum. Corpus Domini nostri IESV CHRISTI  
custodiat animam meam in vitam æternam.*  
*Amen.* Statim ac recepisti, elice actum fidei,

nim-

nimirum credere te , hoc quod habes , esse  
verè Filium Dei , & B. Virginis ; tum cum om-  
ni humilitate quæras ab illo : *Vnde hoc mihi ,*  
*ut Dominus meus veniat ad me ?* Gratias  
agam per breuem orationem vocalem , & pe-  
tam ut idem Patroni mei faciant : tum offre-  
ram illi corpus & animam meam , aliquod  
munusculum in particulari , verbi gratiâ ,  
mortificationis ; tum vota mea , illa renouan-  
do ; demum firmum propositum seruieri  
Matri eius B. Virgini , & dicam Orationem  
Sodalitatis . Deinde conuertam me ad Deum  
Patrem , petens aspiciat in faciem Christi sui ,  
& per sacra Vulnera eius petam , ut suprà ,  
omnia . Finiam rursus gratias agendo , & ve-  
niā petendo , quod tam male illum tracta-  
rim , dicam , *Laudate Dominum omnes gen-  
tes , &c.*

### Confessio.

**A**NTE Confessionem . Post signum san-  
ctæ Crucis , conuertam me ad B. Virgi-  
nem , flagitando eius apud Filium interces-  
sionem , & gratiæ impetrationem , ut criminâ  
mea cognoscam , & detester , & internam eo-  
rum cognitionem & detestationem sentire  
possim ; tum ad Filium , ut idem mihi impe-  
tret à Deo Patre : demum conuertam me ad  
Patrem , ut idem mihi liberaliter largiatur ;  
postea

postea subdam examen , dein dolorem , quem procurabo purum , intensum , & Deo iuuante vniuersalem de omnibus peccatis , adiungam propositum emendationis .

In Confessione , seruabo modum communem Societatis .

Post Confessionem , primò , gratias agam : secundò , statim pœnitentiam implebo : tertio , renouabo propositum emendationis : quartò , inuitabo Christum aliquā aspiracione , verbi gratiā , *Veniat dilectus meus in horum suum* . Vel dic Orationem : *Sit tibi Domine , obsecro , precibus & meritis beatæ Marie semper Virginis , & omnium Sanctorum grata & accepta ista confessio mea : & quidquid mihi defuit nunc & alias de puritate & integritate confessionis , suppleat pietas & misericordia tua , & secundum illam digneris me habere plenius & perfectius absolutum in cælo . Qui viuis & regnas in sæcula sæculorum . Amen.*

*Quadrans post examen vesperi .*

**I**MEDIATE post examen , offeram omnes cogitationes , verba , & opera mea Deo , per Patronum illius diei , in vniione cogitationum , verborum , & operum Christi : secundò , dicam Credo , Orationem Sodalitatis , & Formulam Votorum , protestando , ut supra , me

me velle viuere & mori verum filium Ecclesiae, B. Virginis, & Societatis IESV: tertio asperge lectum lustrali.

Inter exuendum , disponam de modo, quo mihi postridie surgendum erit & meditandum.

Super, vel ante lectum, flecte genua, dic ter Aue, primum B. Virgini Lauretanę, ad honorem maternitatis eius, petendo, ut liberet te ista nocte ab omnibus malis somnijs: secundò, B. Virgini Aspricollis, ad honorem Immaculatæ conceptionis ipsius, vt te statim faciat dormire, & cum diligentia surgere: tertium , B. Virgini Hallensi , ad honorem illius instantis, (de instanti etiam superioribus adde) in quo post mortem suam vnitam fuit Filio suo , petendo felicem successum orationis postridie faciendæ, & lætitiam spiritualem.

Dum lectum ingrederis, renoua intentionem puram, & vni cum quiete Christi. Demum bene cogita, primū de horâ quā surgendum erit ; secundò percurre puncta meditationis, & quiesce in Domino , & sub cervice pone Regulas.

*Modus pro reliquis actionibus.*

**A**NTE . Primò petam gratiam ; secundò renouabo intentionem, nempe me hoc  
**Q** facere

**VITÆ**  
facere purè ad gloriam Dei, in gratiarum actionem, vel præparationem ad Communionem, & ut impetrem, verbi gratiâ, sacerdotum affectum erga B. Virginem, & veram internam humilitatem.

Tertiò, vni cum simili actione Christi Postremò, dole de malo, gratias age de bono.

### *De emendatione vita.*

*Ad extirpandas radices peccatorum  
in communi.*

**M**OTIVA: Primum, Si non procedam ad radices, semper discam, & numquam ad scientiam perueniam.

Secundum, Si non procedam ad radices, semper ero in actu primo, & dispositione proximâ ad peccatum, primò veniale, deinde mortale.

Tertium, Festina eas euellere, cùm adhuc teneræ sunt: si enim nimium confirmentur, posteà, cùm voles id facere, non poteris.

Remedia. Primum, examen particulare diligens; secundum, oratio feruens; tertium, mortificatio assidua.

SVPER-

SUPERBIA.

*Initium omnis peccati superbia est.*

*Motiva ad tollendum superbiam.*

**P**RIMVM, Christus in cruce dicens ad me:  
Disce à me tu, qui prætendis esse è Socie-  
tate mea, quia mitis sum, & humilis corde.

Secundum, si superbiam intus foues, men-  
dax es: vestes enim tuæ, te dicunt esse socium  
Iesu, cum tamen interius verè sis socius dia-  
boli.

Tertium, extirpanda mihi superbìa est, si  
MARIAM adeò humilem Christi ancillam  
opto habere matrem.

Remedia. Primum: eligam mihi Patro-  
nam, quæ in virtute contrariâ mirè excel-  
luit, hæc erit mihi beatissima Virgo MARIA.

Secundum: attendam sedulo cognitioni  
meipius, quid fuerim, nempe nihil; quid  
sim, nempe apostema mundi; quid ero, nem-  
pe cadaver putidissimum.

Tertium: apud Superiores meos, & Pa-  
tres spirituales esse conabor candidus totus,  
& sincerus, & velut aqua purissima.

*Pro humilitate contra superbiam.*

**S**TATVO toto hoc anno sequenti M. DC. XX.  
per Dei gratiam incumbere humilitati:

Q<sup>2</sup>

primò

primò vt ordinatè procedam in ædificandâ domo sanctitatis , incipiendo à fundamento ; secundò , quia si non sum humilis , inutilis sum Societati ; tertio , quia nihil arduum humilibus,nihil asperum mitibus.

Statuo eò dirigere præcipuè omnes orationes meas,desideria,actiones, & examina particularia.

Primum examen particulare, primis quindecim diebus , attendens , quod si oculus meus , id est intentio mea fuerit pura, totum corpus meum lucidum erit. Materia examinis sit nihil facere vt videaris ab hominibus, & quotidie facere duos actus humilitatis, manè vnum,vesperi alium.

Secundum examen. Nil relinquere ob homines, & vanos respectus, & quotidie facere quatuor actus humilitatis , manè duos , vesperi duos.

De reliquis punctis , quæ hic adscribam, dispones absolutis his duobus examinibus, attendens, in quo maximè deficias & pericliteris; solùm aduerte,addendos tibi esse singulis diebus duos humilitatis actus.

Cogitationes,quæ faciant me altè sentire de meipso,statim rescindere; quia sic applicatur immediatè securis radici ipsius superbia, quæ est æstimatio propria.

Nihil dicere,quod in laudem tuam redundare

dare possit, nisi obedientia aliud exigat, quia  
sic subtrahes pabulum vanæ gloriæ.

Quod potes facere in cubiculo, non facias  
extra, ob eamdem rationem.

Cum laudaris, intra te confundi, quod ta-  
lis habearis ab alijs, qualis non es, ob eam-  
dem rationem.

Cum alius laudatur, pellere ex animo om-  
nem displicantiam ex inuidiâ ortam, & exci-  
tare gaudium: quia hac ratione facile te om-  
nibus postpones.

Optare & procurare potiores partes alijs  
deferre, & practicè omnes habere pro Supe-  
rioribus, conuersando cum illis cum tali re-  
spectu humilitatis, &c. quia hoc iubet san-  
ctus Pater IGNATIVS. Nulli te præferre,  
& de omnibus alta sentire. Quia etiam si  
frater tuus modò tibi videatur imperfectus,  
quid scis an à Deo ille electus sit in Marty-  
rem, &c.

Abhorrere, quantum est ex te, gratias gra-  
tis datas, ut facere miracula, &c. quia sæpè  
per illas homo exponitur periculo æternæ  
damnationis.

Humiliationem acceptare primò, patien-  
ter, quia sic auges coronam: secundò, cum  
promptitudine, quia sic imitaris Christum  
dicentem in horto, *Surgite, eamus*: tertio, cum  
gaudio, quia sic habebis paradisum in terris.

Q 3

Opta-

Optare , vt vilis habearis , & si hoc tibi non succedat, ex animo contristare , quia sic fies pretiosus in oculis Dei.

*Actionum emendatio in communi.*

**M**OTIVVM primum: Præceptum Domini est, *Estote perfecti, sicut Pater vester celestis perfectus est;* sicut ergo Deus omnia quæ facit, benè facit, ita debedo & ego.

Secundum , nescis an ista actio tibi futura sit vltima, fac ergo eo modo , quo voles à te factam fuisse vltimam.

Tertium , quælibet actio benè facta , est quasi mel in ore Dei , gratissima eius palato, vel quasi pulchra repræsentatio , quæ mire illi placet. Noli, anima mea, amantissimum parentem tuum illâ recreatione fraudare.

Remedia. Primum, præsentia Dei in omnibus : secundum , determinare mihi modum faciendi omnes actiones meas , in particulari , curare ut approbentur à Patre meo spirituali , & deinde per examen particulare curare illius obseruationem : tertium , procurare omni studio , ut matutina oratio benè tibi succedat,

*Examen*



*Examen particulare de Charitate  
proximi.*

1. PATIENTER sufferre defectus fratrum,  
& facere vnum actum charitatis.
2. Neminem iudicare, & facere duos actus  
charitatis.
3. De omnibus benè sentire , & facere tres  
actus charitatis.
4. Compati alijs , & facere quatuor actus  
charitatis.
5. Congaudere , & congratulari , quando  
alijs res benè succedunt , & facere quinque  
actus charitatis.
6. Ero benignus , & obsequiosus , & omni-  
bus benefaciēs , & facere sex actus charitatis.
7. Semper excusare fratres in animo meo,  
& apud alios , & facere septem actus cha-  
ritatis.
8. Bona & placida verba dare , & facere  
octo actus charitatis.

*Bonus Scholasticus Societatis I E S V.*

*In ordine ad Deum.*

CIRCA Schol. præter gloriam Dei , &  
animatorum fructum nihil intendat ; se-  
cundò , si deuotus & addictus orationi ; gra-  
tiam

Q 4

tiam proficiendi sæpè petat: tertio, solidarum virtutum, & religiosæ vitæ amore flagret: quartò, examen particulare & generale diligenter excerceat, Sacro quotidie deuotissime intersit, & deuotè octauo quoque die communicet; hæc enim tria vehementer cordi habuisse S. P. nostrum IGNATIUM dum Parisijs studeret, tradit Masseus lib. I. cap. 19.

*In ordine ad studia.*

1. Persuadeat sibi, quod studere secundum mentem Societatis, sit res magni meriti.
2. Quoad genus studiorum & Præceptores sit indifferens.
3. Seriò & constanter animum ad studia adjiciat.
4. Seruet præscriptam diuisionem temporis diligenter.
5. Nullis vtatur libris, præterquam à Præceptore præscriptis.
6. In audiendis lectionibus sit assiduus, diligens in præuidendis & repetendis, & tam in domesticis quam externis disputationibus & repetitionibus, modestiæ & doctrinæ specimen præbeat.
7. Vbiique sit memor modestiæ & grauitatis religiosæ.
8. Scripta domi relegat, intelligat, intellecta

lecta examinet, obijciendo sibi & soluendo;  
sique nequit soluere, notet.

9. Quæ notatu digna in lectionibus, in  
scripta referet, postmodum cum otio in  
alium librum transferenda.

10. Ulta duas horas non continuet lectio-  
nem aut scriptioñem, quin parumper inter-  
rumpat.

11. Quod à Magistro præscriptum fuerit,  
memoriæ mandet, stylumque diligenter ex-  
erceat.

*In ordine ad alias.*

Primò Latinè loquatur: secundò, si exter-  
nis scholasticis loquendum, cum facultate,  
nonnisi de litteris, vel ad spiritum pertinenti-  
bus: tertio, memor sit in omnibus denique  
se filium esse adeò bonæ matris Societatis  
I E S V.

*Quædam placita & de c r e d e c o m m o r a l i a , q u æ  
s i b i c o n s c r i p s i t I o a n n e s c u l t o m a n n o c u i -  
t a s u a .*

1. **N**VLLA res mihi magis vitanda, quam  
notium, & tristitia, & familiaritates.

2. Non sum securus, nisi habeam verum  
& filiale affectum erga B. Virginem.

3. Tamdiu ero verus filius Societatis,

Q 5                    quam-

quamdiu ero cādīdus & apert⁹ Superioribus.

4. Non facile petam facultatem generalem prō aliquā re.

5. Viuam in dies & horas, nihil sollicitus de crastino.

6. Profitebor me hominem spiritualem & deuotum.

7. Nolo vñquam cogitare quid de me futurum sit, sed Deo me totum credere, & confidere.

8. Quidquid affert inquietudinem, est à diabolo.

9. Non dependere, aut inniti vlli, nec p̄ceptori, &c. sed soli Deo, & meis Superioribus.

10. Illud quod possum facere hac horā, non differam ad aliam horam.

11. Multūm confidam in gratiā m̄cæ vocationis.

12. Pro paruis defectibus magnas facere p̄œnitentias.

13. Nisi ego sanctus euadam interea dum sum iuuenis, numquam ero sanctus.

14. Maximi facere minima.

15. Nolle, vt Superior, quando aliiquid imperat, vllam reddat rationem.

16. Sequi in omnibus communitatem, & maximè odiſſe singularitates.

17. In omnibus ero mundo contrarius.

18. Du-

18. Ducam maius esse momentum in rebus spiritualibus & virtutibus, quam in doctrinâ vel alijs donis naturalibus & humanis.
19. Qui plus laborat, minus laborat.
20. Odisse ut pestem dispensationem in Regulis.
21. Si non habeo habitum orationis, non viuam in Societate cum pace.
22. Multum facere, parum loqui.
23. Attende tibi; de alijs quid agatur quid ad te?
24. Non erubescere facere omnia illa, quæ doctus es in Nouitiatu.
25. Talis & tantus es, qualis & quantus es apud Deum, non apud homines.
26. Ita ero zelosus honoris Societatis IESV, sicut ambitiosus verus honoris proprij.
27. Si vis esse filius B. Virginis & Societatis, zelator esto castitatis tuæ.
28. Interea dum ero studiosus Societatis, amabo & incolam cubiculum quantum possibile est.
29. Si tibi est cordi honor Societatis, sit tibi cordi modestia, & in recreatione loqui de rebus spiritualibus.
30. Sit tibi dulce pro amaro, & amarum dulce.
31. Sit tibi curæ Deus, & Deo erit cura dete.

32. Vide

32. Vide ne ob negligentiam tuam Deus tibi auferat teneritudinem animi, & permitat te insensibilem.

33. Quod tibi displicet in alijs, numquam facias, sed quod placet.

34. Vide ne vlli vniuersum è Superioribus tuis sis grauis, & nulli in Societate molestus, sed potius omnium sis recreatio.

35. Geram me in Societate, ac si essem mendicus, per gratiam admissus in Societatem, & omnia mihi cogitabo fieri ex mera gratia.

36. Nihil prodest mihi vniuersum mundum lucrari, animæ verò meæ detrimentum pati.

37. Sis spiritualis avarus, & mercator.

38. Si hominibus placerem, Christi seruus non essem.

39. Tantum proficies, quantum tibi ipsi vim intuleris.

40. Matrem præbe te erga alios, erga te ipsum iudicem.

41. Quid mihi prodest diu in Societate vivere, & ad illius finem non peruenire?

42. Non curabo aliorum dicta circa observationem Regularum, & propositorum.

43. Procedam semper licite, non curando ista quæ vocant complimenta.

Miscel-

*Miscellanea.*

**F**ACILIVS est loqui de rebus spiritualibus cum paucioribus, quām cum multis.

Non est bonum semper agere cum ijs-  
dem, sed cum diuersis in recreatione.

Expertus sum , dare medium diem cum  
liberalitate rebus spiritualibus in die **Com-**  
**munionis**, & alijs Festis vnam horam, & fin-  
gulis mensibus vnum diem , nil detrahere  
studijs.

Contentus ero cibis communibus.

Numquam petam facultatem generalem  
dandi vel accipiendo*ri*.

Primis tribus diebus cuiusque mensis Re-  
gulas meditabor omnes.

Nihil tenere in cubiculo superfluum.

Magnam habere curam vestium mea-  
rum , & earum rerum quæ vsui meo desti-  
nantur.

Dabo me totum cultui B. Virginis.

Facito cum diligentia examen particulare.

Appicare me seriò & constanter studijs.

Facere mihi familiares Regulas electionis  
B.P.N. pro obseruantia Regulæ Summarij.

Loqui Latinè cum Præceptore , etiam si  
ipse loquatur Italicè.

Non videre equitationes , nec nisi semel  
Processionem Corporis Domini.

Ad

Ad nomen beati Aloysij aperias caput.  
In surgendo manè ero quām diligentissimus.

Omnia Superioris mandata & voluntates scripto adnotabo , & exactissimè conabor obseruare.

De die , quantum fieri potest , non dormiam.

Affectum meum erga venerabile Sacramentum sedulò souebo , & saltem quinques in die illud visitabo. Et singulis diebus Iouis ob id faciam aliquam in Refectorio pœnitentiam.

Diebus Sabbatinis lauabo scyphos in culinâ in honorem beatæ Virginis.

Quandocumque aliquid pœnitentiâ dignum commisero , contra aliquam Regulam , toto tempore vitæ meæ humiliter illam petam.

Eligam certum minus impeditum quois mense diem , quo me tribus quatuorve meditationibus recolligam.

Ad Confessionem inter primos semper conabor adesse.

Singulis septimanis accedam ad Patrem Rectorem , & ei reddam rationem ; primò , an seruauerim silentium ; secundò , an locutus sim de rebus spiritualibus ; tertio , an omnia mea seruauerim proposita.

Causebo

Causebo mihi sedulò à iudicando alios, aut  
aliorum rebus me immiscebo : si aliquid in-  
excusabile occurret, compatiar, me inspi-  
ciam, & de facto recitabo pro emendatione  
vel Aue, vel simile.

Valdè verecundè & humiliter in omni  
loco agam cum Fratribus.

Disrumpar potius, quam vel minimam  
ordinationem, aut Regulam voluntariè  
transgrediar ; potius amittere omnem sani-  
tatem, quam ob illam ullam Regulam præ-  
tergredi.

Potius mori, quam pro sanitate ullam  
Regulam violare.

Professorum ero obseruantissimus.

Valdè lubentem me præbebo in conce-  
dendis dictatis, & similibus, & charitatem  
custodiam ut pupillam oculi.

In omnibus Superioribus meis Deum in-  
uenire studebo.

Quam maximè addictum me seruabo  
rebus spiritualibus, præsertim meditationi,  
examini, & lectioni spirituali.

Cogitandum mihi est, debere me etiam  
cum corpore meo alere Christum, scilicet  
mortificatione ; itaque numquam à mensâ  
recedam, nisi me in aliquo mortificauero.

Viuere in dies & horas, sine sollicitudine  
de futuris contingentibus, committendo  
mea

mea omnia prouidentiae diuinæ, meisque Superioribus.

Non erubescere facere frequenter pœnitentias in Refectorio.

Non erubescere cùm aliquid fregeris, verbi gratiâ vitrum, poculum, vel aliud quid feceris, petere pœnitentiam, & pœnitentias omnes petere genibus flexis, etiam si Sacerdos aut quicumque sis.

Non erubescere frequenter agere cum Patre spirituali, & cogita quòd ei nil potest accidere iucundius.

Non erubescere querere quibuscum possum loqui de rebus spiritualibus, & frequenter me iungere fratribus Coadiutoribus.

Sinam Sacerdotes medio paſtu præcedere. Si aliquis tecum sua confidenter volet communicare, fac ut sciat, te illa quæ dicet, Superiori dicturum, si ita videatur.

Conuersatio tepidorum vitanda, ut lipsientium, aspectus mulieris vitandus sicut basiliscus.

Humiliter, & cum magnâ alacritate in omnibus quæ frater meus Sacrista præcipiet, obediam ut Christo.

Quando discedit à te Christus, ô anima mea, & desolaris, non turbetur cor tuum: veniet enim Dominus, & non tardabit. Oculi tui semper Christum prosequantur fugientem:

tem: & si ad delectationes mundi, aut carnis inclinaris, clama ad illum: *Domine, quō ibimus? verba vita eternae habes.*

O Domine, præter Communionem quid mihi dulce & iucundum sit, cùm tu per eam clarificari deuotissimè rogaueris? Annuntia bo te fratribus meis bono & sancto conuersationis exemplo; & de omnibus benè sentiam.

Domine, sum palmes aridus in Societate tuâ, non abscindar à te vite verâ, sed secundum misericordiam tuam influat in me succus gratiæ tux.

Domine, ego te toties in fratribus meis iudico peccatorem, &c. quale & quād durum mihi iudicium expectandum est, qui tam durus tui sum Iudex?

Quid tibi, ô anima mea, prodest amari ab hominibus, si propter illum amorem amiciam Iesu perdas cum Pilato?

O Domine, quoties inspirationes tuas contempsi, neglexi, hominibus placere desiderans?

Christus Dominus, etiam si corpus suum nimis debile sciret, tamen crucem humeris suis exceptit: tu anima mea obedientiæ mandata ob pusillanimitatē tuam non suscipes? Christum Simon iuuuit, iuuabit te Christus ipse.

R. IESVS,

I E S V S , mundus, diabolus, & caro mea  
quærunt me , & nemo, nisi velim , inueniet  
me: si diabolus, mundus, caro inueniant me,  
vt leones rugientes deuorabunt me , solus  
I E S V S ditabit & saluabit inuentum me. Vo-  
lo, I E S V bone, volo vt inuenias & possideas  
me : nam si tu inuenis me, inueni ego te , &  
sufficit mihi.

Prudenter clamas Petre , *Recede à me Do-  
mine, quia homo peccator sum*, non enim rece-  
dit I E S V S , nisi priùs à I E S V quis recesserit.

Bestiæ , vt finem suum consequantur,  
spontè contendunt, & tu, anima mea, tot tan-  
tisque incitamentis indiges ?

Mouet me ista consideratio, ego in Socie-  
tate seruus omnium esse deboe , non domi-  
nus, & ista debet esse gloriatio mea; quomo-  
do enim velim esse dominus , cùm Christus  
Dominus non venerit ministrari, sed mini-  
strare; & beatissima Virgo MARIA sese esse  
glorietur ancillam ? Geram igitur me cum  
Fratribus meis omnibus , vt seruum decet,  
& vile mancipium.

Sicut accidens semper agit vt subordina-  
tum, & applicatum à substantiâ ; ita ego, re-  
spectu Superiorum meorum , & Superiores  
mei, respectu Dei.

Sicut non prodest habere virtutem acti-  
uam, & non applicare passo ; ita nec prodest  
habere

habere merita Christi, & mihi non applicare.

Quid tibi, ô anima, libet hæc dicere vel facere, quæ postmodum in cubiculo oportebit deflere?

Vis videre si amas vocationem tuam, vide an ames mortificationem tuam. Vocatio tua est, esse Socium IESV. Quomodo autem vis esse Socius IESV, nisi sis crucifixus cum IESV?

O bone IESV, quis deflectat à viâ, vbi tu es via? quis erret à viâ, vbi tu es lux & dux in viâ?

Omni studio curabò, & tuebor pacem, & lætitiam internam.

Attendam seriò, quid mihi agendum sit, & non quid agatur ab alijs.

Numquam ero otiosus.

Nulli, qui te liberiorem faciat, te credito; sed profitere cum omnibus te spiritualem & deuotum.

Salutare Patres, vt sanctos Confessores; Fratres, vt Angelos.

Attendere ad proprios defectus, non ad alienos, & te omnibus inferiorem reputare.

Fac habitum in excusandis alijs in visceribus charitatis.

Cedere alijs commodiora in omnibus, & fugere quæ sunt speciosa.

Non sis facilis in affirmando, & negando,

R. 2 &

& responsio tua sit simplex , Est, est , Non,  
non : *Fratello si, fratello no.*

Quid vis videre , quod non licet habere?  
A multis temptationibus liberat custodia oculorum, quæ est mater deuotionis.

Cave te ab excusando apud Superiores.

Non respicias bonum proprium, sed bonum commune & gloriam Dei.

In rebus agendis caue à spiritu contentio-  
nis & contradictionis : & quando aliquid faciendum est, ut laborandum in culinâ, liben-  
ter sequaris iudicium alterius ; & idem sentias  
in rebus leuioribus.

Obliuiscaris iniuriarum , quas tibi proximus fecit, sic enim S. Dorotheus docet.

Etiam in minimis rebus pete consilium.

Non designes aliquid de teipso , sed libera-  
ram tui dispositionem relinque Superioribus.

Optimum medium ad acquirendum do-  
minium tui, & animi tranquillitatem, est ab-  
negatio proprij iudicij , & propriæ voluntatis , quæ est propria filiorum Societatis ; & à  
Christo requisita in sequentibus se : *Qui vult  
venire post me, abneget se.*

Abnegatio proprij iudicij est mortificatio  
illius actus intellectus , qui non est confor-  
mis Dei, & hominum sapientum iudicio.

Abnegatio propriæ voluntatis , est mortifi-  
care ita voluntatem tuam , ut nil interius

exte-

exteriusque velis ob explendam voluntatem tuam, sed in omnibus rebus exequaris voluntatem Dei, & Superiorum.

Pro aliquo beneficio ab homine accepto dicas ei, *Deo gratias, Dominus sit vel erit merces.*

*Qui non æstimat orationem, non potest perdurare in viâ spirituali.*

Tantum displicet oratio diabolo, ut omni studio eam impedire conetur.

Contemptus sui est via compendiosa ad perfectionem, & caussa magnæ quietis.

Quando occurrit mortificatio honoris, toto corde eam amplectere.

Obedientia consistit in vnione voluntatis humanæ cum diuinâ, & in executione eorum quę Deus inspirat. Primus actus est, cognoscere inspirationes Dei: secundus, eas auscultare: tertius, proponere executionem: quartus, exequi.

Omnibus diebus Sabbatinis aliquid in recreatione loqui de beatâ Virgine, & Dominicis de venerabili Sacramento.

Quando vides aliquem è Societate alterius Collegij, reuerere illum ut Angelum.

Cause, ne id quod tibi displicet, in alijs, etiam in naturalibus, spuendo v.g. vim quam facias. Verbi gratiâ:

Tarditas & languor in motu, displicet.

R 3                    Liber-

Libertas in loquendo etiam de spiritualibus, displicet.

Contradiccio frequens, displicet.

Nimis delicate se habere, displicet.

Libertas in conuersando, displicet.

Modus conuersandi ironicus, displicet.

Ferre manus post tergum, displicet.

In plateâ retrò respicere & libere, displicet.

Facilè mouere caput, displicet.

Cachinnari, clamare altâ voce, immoderatè ridere, displicet.

Loqui in Refectorio, in Ecclesiâ, in Sacristiâ, & temporibus vetitis, displicet.

Attende quæ tibi placent in alijs, & hæc facias, & imiteris.

Placet in Patre nostro Generali modestia, affabilitas, cordialitas, laetitia vultus, & quod sequitur in omnibus communitatem. In Patre Prouinciali studium litterarum: in Patre Rectore & Patre spirituali, semper sui similes; in Patre Praefecto studiorum reuerentia erga omnes; in Praeceptore amor & gaudium de profectu studiorum discipulorum; in Patre N. patientia in morbo; in Patre N. silentium; in Patre N. modestia & verecundia, & recessus seu solitudo; in Patre N. zelus animarum, & indefatigabilitas; in Patre N. amor cellæ, & simplicitas; in Patre N. amor

amor Instituti ; in Patre N. amabilitas & affabilitas ; in Patre N. iucunditas cum spiritualitate ; in Patre N. quod sit omnium seruus , hilaris , & laboriosus ; in Patre N. se omnibus socium præbere ; in fratre N. fuga otij ; in fratre N. supplere omnibus ; in N. viuacitas ; in N. mansuetudo & tractabilitas ; in N. nitor , mundities , & hospitalitas ; in N. sinceritas ; in N. suo tempore omnia ; in N. visitatio infirmorum ; in N. deuotio.

Lætitia exterior coniuncta cum obseruatiâ magnâ, placet.

Ante & post scholas visitare venerabile Sacramentum, placet.

In vineâ salutare B. Virginem, & visitare venerabile Sacellum B. P. N. IGNATII, placet.

Ne quidem herbae folium in vineâ carpare, placet.

Facultatem facere socio cubiculi , ut in cubiculo sine respectu faciat quod vult , placet,

Permittere me regi ita ac si essem infans vnius diei, placet.

Facere ex corde, & cum totâ applicatione quæcumque facis, placet.

Omni studio aggredi illa omnia, quæ numero ad finem meum utilia fore , & in parti-

R 4 culari

culari serio & constanter studijs animum applicare, placet.

Manus iunctas ante pectus, & numquam pendulas, placet.

Fac tibi familiare institutum, & tanto magis proficies, quanto magis illud amabis: nam exercitia ostendunt internum sancti Patris IGNATII, Constitutiones idem in scripto, & vita eius in opere.

Sis vilis in oculis tuis; talis opta haberi: & si habearis, gaude, non contrastare.

Nec bona nec mala dicas de te ipso, nisi ex obedientia.

Quoad exteriora, quod potes facere in cubiculo, non facias foris.

Abhorrere gratias illas gratis datas, ut facere miracula, &c.

Facere omnia tamquam si ultima forent.

Non elicere umquam appetitum honoris.

Non confidere umquam medijs quæ adhibes.

Omnis inquietudo ab amore proprio.  
Pati, otium fugere.

Collo-

*Colloquia spiritualia diei vineæ.*

*Aduocata MARIA.*

**P**RIMÒ locus, solarium; secundò tempus, in die vacationis & vineæ, composto Sacello à prandio; tertio, personæ N.N.N. quartò materia, virtus, quæ plura vota; quinto, modus. primò, definitionem & regulam; secundò, actus praticos internos & externos; tertio, motiva; quartò, media vel exempla. Sexto, finis, accendere & inflammare primò nosipso, & deinde alios.

*Humilitas.*

*Definitio.*

**E**ST animi inclinatio ad contemptum sui, orta ex cognitione sui, per quam homo Deo se subiicit, & hominibus propter Deum, seu ob aliquam bonitatem à Deo illis cōmunicatam.

*Actus.*

1. Amare nesciri, & pro nihilo reputari, spernere sperni, cupere sperni, quærere sperni.
2. Subiicere se Deo, & hominibus cum magnâ promptitudine.

R 5

3. Nil

3. Nil umquam facere aut dicere, ut propriam inde laudem referas.
4. Sufferre iniurias & verba dura.
5. Amare & gaudere, quod defectus tui per alios alijs aperiantur.
6. In verbis ostendere humilitatem, & non excusare se.
7. Omnes meliores & superiores te dicere.

*Motiuæ.*

1. Christus talis fuit, & dixit: *Discite a me, quia mitis sum, & humilis corde.*
2. Beata Virgo talis fuit, & dixit: *Ecce ancilla Domini, &c. Et, Respexit humilitatem ancillæ suæ.*
3. Humilis omnia impetrat, & habet claves thesauri Dei. *Oratio humiliantis se, &c.*
4. Quantum se quis humiliat in terrâ, tantum gloriæ habebit in cœlo.
5. Maximi honores & laudes, sunt vanitas.

*Media.*

1. Cognitio propriæ vilitatis & infirmitatis, & defectibilitatis in corpore, & in animâ.
2. Oratio feruens.
3. Humiliatio frequens.

*Exem:*

*Exempla.*

1. B. Franciscus Borgia abdicato Ducatu, se subscribebat *Franciscus peccator*: & cùm socius ei quadam nocte in faciem expueret, non aduertens, ipse nullum vilorem locum suâ facie reputabat.

2. Primarius quidam Alexandrinæ ciuitatis, filiam obsecram habebat, Patres eremiti ob humilitatem liberare eam nolunt: puella obsecra cuidam sancto Seni sportam ementi alapam infligit, ille aliam maxillam præbet, diabolus abscedit, & liberatur.

3. Cuidam iuueni sancto diabolus apparet, dicens, Ego sum Gabriel missus iam ad Ioannem, & ad Virginem. Respondet: Vide ne ad alium missus sis, nam ego dignus non sum ut Gabriel ad me veniat. Diabolus confusus fugit.

*Patientia.**Definitio.*

**E**S T virtus, quâ mala huius saeculi æquo animo sustinemus, ita ut propter illa non immoderatè turbemur aut tristemur, ne aliquid minus honestum aut decorum admittamus.

*Actus.*

*Actus.*

1. Nullum exterius impatiencie signum dare.
2. Excludere à corde omnem perturbationem, displicentiam, tristitiam, & multò magis desiderium vindictæ, etiam minimum.
3. Omnia aduersa accipere de manu Domini.
4. Perferre omnia patienter, promptè, hilariter.

*Motiva.*

1. Christus adhortatur: *In patientia vestra possidebitis animas vestras.*
2. Pax nostra debet esse in multâ patientiâ.
3. Patientia est corona omnium virtutum.
4. Per patientiam sumus admirabiles hominibus, eosque conuertimus.

*Media.*

Primò, Gratia Dei: secundò, Amor Dei: tertio, Spes præmij: quartò, Exemplum Christi: quintò, Cognitio propria: sextò, Assuetudo in patiendo.

*Exempla.*

1. Quidam Christianus ab infidelibus multis iniurijs appetitus, *Quid, inquit, miraculosi*

culosi fecit Christus tuus? Hoc, inquit, quod  
ego istas iniurias vestras æquo animo feram.

2. Quidam Monachus ab alio Monacho  
inuido orbatus oculo , patientiâ suâ illum  
conuertit. *Speculum Exemplorum.*

3. Quidam Eremicola, casu à venatoribus  
sagittâ percutitur, & sagittam extrahi non est  
possit, sed diu illam tenuit ob patientiæ exer-  
citationem.

4. Mulier quædam plagam vermis plen-  
nam patientissimè ferebat! audiuit hoc san-  
ctus Dominicus, accedit ad illam, petit vnum  
ex vermis, nolebat dare: tandem condi-  
tione ut restitueret, dedit; acceptum dum  
manu tenet, in margaritam conuertitur,  
eum, nolente socio, eidem reddidit, & pro-  
missis stetit, & in vermem rediit. Et sic de  
alijs virtutibus.

*Corona duodecim stellarum B. MARIAE  
Virginis.*

*Mulier amicta sole, & in capite eius corona  
stellarum duodecim.*

**F**INIS huius piæ exercitationis est, con-  
cipere erga B. Virginem hyperduliam,  
sive reuerentiam, gratitudinem, spem; eam  
imitandi desiderium. Ter recitatitur Pater  
noster

noster ad sanctissimam Trinitatem ; duodecies Ave Maria ad beatissimam Virginem.

*odit enim  
nullum autem*

*Prima Meditatio.*

**P**RIMO itaque, recitato Pater, petetur à Patre æterno reuerentia erga B. Virginem, omni honore dignissimam multas obcaussas, quæ sunt: prima, Electio, ut esset mater Dei: secunda, Desiderium Patriarcharum, & oracula Prophetarum: tertia, Puritas, ab omni peccati labe aliena: quarta, Ornamenta virtutum omnium: quinta, Cumulus gratiarum alijs omnibus à Deo concessarum: sexta, Regina Angelorum & hominum.

*Secunda Meditatio.*

*De virtutibus beatae Virginis erga Deum.*

*Prima, Fides.*

**P**RIMÒ, dum Ave Maria recitatur, petetur à B. Virgine, ut impetret nobis Fidem, quâ ipsa præcipue enituit, Primò, credendo se virginem & matrem futuram, ita & tu omnia poteris, &c. Secundò, plurimi faciendo mysteria Fidei, quæ docuit etiam Apostolos; ita tu plurimi facies eadem mysteria Fidei. Tertiò, tempore passionis Dominicæ

minicæ omni ex parte stabilis & firma permanendo; ita & tu perseuerabis tentationum tempore.

*Tertia Meditatio.*

*Secunda virtus, Spes.*

**A**VE recitato, petemus Spem quâ beata Virgo maximè enituit, Primo, in sperandâ æternâ gloriâ, & quidquid à Filio pettebat; tu eadem sperabis. Secundò, in se totam, cùm summis premeretur angustijs, diuinæ prouidentiæ committendo; pendebis & tu à diuinâ prouidentiâ. Tertiò, in longanimiter expectandâ gloriâ tantopere à se expetitâ; tu etiam longanimis Dei dona expectabis.

*Quarta Meditatio.*

*Tertia virtus, Charitas.*

**P**ETEMVS tertio, Ave recitato, Charitatem quâ enituit. Primò, quia amavit, ab omni proprio commodo aliena: tu quæres maiorem Dei gloriam in omnibus. Secundò, feruens amore, & laboriosa, numquam cessans: tu numquam defatigaberis. Tertiò, ob amorem fortis, & constans iuxta crucem: tu amabis etiam tentatus. Quartò, liberalis,

& se

& se totam cum Filio suo communicans: tu offeres te in holocaustum. Quintò, tota diuino amore æstuans, & languens: tu Deum ardenter amabis ex toto corde.

*Quinta Meditatio.*

*Quarta virtus, Religio.*

**R**ECITATO Aue, petes Religionem, quæ in B. Virgine apparuit. Primò, in tractando Christi infantis corpore, illud vesciendò, nutriendò, educando, deuotè, reverenter, diligenter, & familiari cum eodem iam grandiore, consuetudine: tu imitare in Communione. Secundò, in oratione & meditatione. Maria conseruabat omnia verba hæc, conferens in corde suo; ita & tu in meditationibus. Tertiò, in cærimonij legis, inuisendo Templum: tu fac similiter in visendis Templo. Quartò, plurimi faciendo verba à Filio proleta: & tu in concionibus quæ audies verba.

*Sexta Meditatio.*

*Secundum Pater noster, ad Filium.*

**S**E C V N D O Pater recitato, petemus à Filio, qui spes nostra est, ut magnâ cum spe ad Virginem accurramus: quia primò Deum ipsum

ipsum ad nos traxit: secundò, est aquædūctus, per quem facile cælestem aquam in nostros hortos deriuabimus: tertio, Regina est ditissima & liberalissima.

*Virtutes B. Virginis erga seipsam.*

*Septima Meditatio.*

*Quinta virtus, Humilitas.*

Post recitationem Aue, petemus Humilitatem, quā ipsa salutata ab Angelo, desponsata à Patre æterno in matrem, electa à Filio, gratiâ plena à Spiritu sancto, se ancillam dixit. Disce tu laudatus humiliter de te sentire. Secundò, inuisit Elisabeth, illiique seruuit quasi mensibus tribus. Disce libens te in abiectis muneribus exercere. Tertiò, mysterium Incarnationis celavit, & laudata, in Deum retulit laudationem, dicens: *Magnificat anima mea Dominum.* Disce res plausibiles abscondere, & bona Deo refer accepta. Quartò, seruuit sancto Iosepho, vltimo loco sedebat; ideoque in vltimo loco nominatur in Actibus Apostolorum. Tu noli superemnere, super alios sedendo.

S

*Octaua*

*Octava Meditatio.**Sexta virtus, Virginitas.*

**R**ECITATO Aue, pete à beatâ Virgine Castitatem, ipsa enim prima omnium castitatem vout. pete ergo, vt eam in te conferuet. Secundò, maximo illam zelo custodiuit: *Quomodo siet istud, &c.* ideo domi manebat, ideoque Hortus conclusus, & Porta clausa dicitur: pete externorum & internorum sensuum custodiam. Tertiò, impuras aliorum cogitationes suo aspectu pellebat: pete vt tuâ conuersatione castitatis amorem ingeneres in alijs.

*Nona Meditatio.**Septima virtus, Fortitudo.*

**R**ECITATO Aue, petemus Fortitudinem, quâ beata Virgo enituit, Primò, in Christi Domini morte, vt te doceret in tribunali bus, & in diuino obsequio difficultates omnes superare. Secundò, in iniurijs à Iudeorum gente collatis: disce iniurias perferre. Tertiò, inferuiendo Filio suo, omnibusque Christianis iuuandis: disce amare labores pro Dei gratiâ, & animarum salute.

*Decima*

*Decima Meditatio.*

*Octava virtus, Paupertas.*

**A**VE dicto, pete Paupertatem, quâ beata Virgo enituit, cùm paritura Dei Filium in stabulum coacta fuit secedere: & tu paupertatis affectum experieris libenter. Secundò, cùm se omni humanâ ope destitutam sensit, siue cùm fugiendum in Ægyptum, siue cùm filium suum morti traditum queretur: tu quoque, deficiente humano auxilio, innitaris diuino.

*Vndecima Meditatio.*

*Pater noster, ad Spiritum sanctum.*

**R**ECITATO Pater, pete à Spiritu sancto gratum animum erga beatam Virginem, cui multum debebis; quia Primò cooperata est nostræ redemptioni, conformando, pariendo, lactando Filio Dei, eiisque seruiendo. Secundò, ut mediatrix nostra, peccantes nos Deo reconciliando. Tertiò, quia ut castrorum acies ordinata, insidiantes dæmones fugat, aduersaque omnia à nobis pellit. Quartò, ut mater amantissima nostris malis à Deo medelam impetrat.

*Virtutes B. Virginis erga proximum.*

*Duodecima Meditatio.*

*Nona virtus, Charitas fraterna.*

**P**OST Aue petimus Charitatem quæ in eā eluxit, Primò, in desiderandâ quærendâq; omnium hominum salute: imitaberis desiderium & studium alienæ salutis. Secundò, in adiuuandis alijs, vt S. Elisabetham, & sponsos in nuptijs Canæ, cùm vinum non habebant: imitaberis promptitudinem, quæties seruiendum erit aliorum commodis.

*Decimatercia Meditatio.*

*Decima virtus, Obedientia.*

**A**VE recitato, petimus à B. Virgine Obedientiam, quâ ipsa excelluit, cùm describeretur vniuersus orbis, obediendo Imperatori Ethnico Mater Dei, vt doceret obediens superioribus, non solum bonis, sed etiam dyscolis & malis. Secundò, in purificatione quærendâ post partum, cùm illâ lege non esset adstricta; vt te doceret obediens legibus, quibus teneris. Tertiò, obediendo Iosepho sponso, siue fugiendum esset noctu in Ægyptum,

ptum, siue Nazareth redeundum, siue quid  
aliud agendum; vt te doceret obedientiam  
cæcam erga Superiores tuos. Quartò, curan-  
do, vt Filij sui præceptis alijs obedirent, vt in  
nuptijs dixit ministris, *Quodcumque dixerit  
vobis, facite; vt te doceret, laborandum etiam  
tibi esse, vt ab alijs obediatur Superiorum  
mandatis.*

*Decimaquarta Meditatio.*

*Vndecima virtus, Misericordia.*

POST Aue, petimus à B. Virgine Misericor-  
diam, & benignum animum, quo prædi-  
ta ipsa fuit; quia Primò esurientes cælesti pa-  
ne in Filio suo pauit, & eumdem dedit infir-  
morum medicinā, pretium captiuorum, &c.  
Sic tu succurre miseris in rebus spiritualibus  
& corporalibus. Secundò, eorum miseren-  
do, qui afflictionibus (quas ipsa, dum esset in-  
ter nos, experta est) agitantur; ita tu animo  
commouere in alienis necessitatibus & miser-  
ijs. Tertiò, accepta à Filio dona cælestia no-  
biscum liberalissimè communicauit: ita tu  
quæ gratis accepisti, da. Quartò, dicitur Ma-  
ter misericordiæ, quia in cælo pro peccatori-  
bus exorat: ita tu fac similiter in orationi-  
bus tuis.

*Decimaquinta Meditatio.**Duodecima virtus, Modestia.*

**R**ECITATO Aue, petemus à beatâ Virgine Modestiam, quâ illa tum in conuer-  
sando tum in colloquendo fuit exornata.  
Primò, à sancto Dionysio Areopagitâ tanti  
habita fuit, vt visam beatam Virginem tam-  
quam Deam adorasset, nisi fide prohibitus  
fuisset. Secundò, cum hominibus rarò, & de  
rebus tantum necessarijs loquebatur, & cum  
Deo sàpissimè, orando & contemplando.  
Tertiò, nil temerè effundebat, singula verba  
expendebat, vt verissimè dictum sit à sancto  
Lucâ, quod in corde suo omnia conferebat.  
Voces illius erant utiles, vt in Incarnatione  
Verbi, in sanctificatione Ioannis Baptistarum, in  
nuptijs Canæ. Erant pudicæ, ad suam virgi-  
nitatem conseruandam, *Quomodo fiet istud.*  
Humiles, *Ecce ancilla Domini, &c.* Humanæ  
& misericordes, in salutatione Elisabeth; &  
in nuptijs, *Vinum non habent.* Laudantes  
Deum, *Magnificat, &c.* His dotibus verbo-  
rum B. Virginis consideratis, petes ab ea-  
dem, vt suis precibus eam tibi loquendi ra-  
tionem impetret, quâ eius voces sanctissimas  
exprimas imitando.

*Modus*

Modus recitandæ Salutationis Angelicæ , ex  
secundo modo orandi B.P.N.IGNATII.

Prima pars, AVE MARIA.

PRIMÒ, adora MARIAM , quæ interpretatur *Stella maris*; nam polare velutius periculosam vitæ huius nauigationem, si attentè inspicias , dirigit ad æternæ vitæ portum. *Illuminatrix*; nam virtutum suarum exemplo , solis instar , ad bene operandum prælucet. *Domina*; cuius in supernâ curiâ auctoritas est maxima . Secundò dole , primò, quia naufragus in hoc mari, sideris huius ductum non quæris; secundò, quia in tenebris ignorantiae mersus, illuminatricis huius radios non optas: tertio , quia indigens alieno patrocinio, supremum huius Reginæ, cui nec facultas , nec scientia, nec voluntas tibi auxiliandi deest , patrocinium non desideras: quartò , spera ab hac Dominâ auxilium ad expugnandos hostes spirituales ; ab hac Illuminatrice lucem ad te Deumque cognoscendum ; ab hac Stellâ maris cursum securum ad portum salutis : quinto, gratias age Deo & beatæ Virgini pro his beneficijs, MARIÆ nomine comprehensis : sexto, pete à Deo, ut velet te duci ab hac Stellâ totius mundi ; illumini-

S- 4

nari

nari ab hac Illuminatrice totius mundi, regi  
ab hac Dominâ totius mundi.

*Secunda pars, GRATIA PLENA.*

Primò, adora beatam Virginem, & in illâ gratiæ diuinæ plenitudinem, cuius intellectus fidei lumine, voluntas charitatis ardore, memoria diuinorum beneficiorum recordatione, concupisibilis temperantiâ, irascibilis quiete maximâ, oculi simplicitate columbinâ, aures attentione ad Dei vocem, lingua moderato sermone, gustatus sobrietate, tactus pudicitiâ, pedes diligentia, manus bonis operibus, conuersatio virtutum exemplis, & omnia denique plena sunt virtutibus, & donis Spiritus sancti. Secundò, dole paupertatem tuam, qui gratiam vel reicis, vel permittis otiani, quam ob causam miserijs plenus, & totus inanis gratiâ. Tertiò, spera MARIE precibus eam tibi, quæ decet, gratiæ plenitudinem esse concedendam. Quartò, gratias age Deo, qui MARIAM, tamquam vas cœlesti plenum rore, exposuit, ut inde gratiam omnes haurirent. Quintò, pere à beatâ Virgine cœlestis huius roris guttam, ut gratus & amicus Deo sis, stabilis & ditior in dies post acceptam gratiam.

*Teriu*

*Tertia pars, DOMINVS TECVM.*

Primò, adora beatam Virginem, quia Deo maximè est vñita, corpore in incarnatione, spiritu in intellectu rerum diuinarum cognitione illustrato, voluntate Deo maximè conformi. Secundò, dole, quia Dominus à te, vel lethali culpâ eruptus, tecum non fuit semper, vel quia à lethali culpâ immunis, Dominum ( eius gratiâ cuncta faciens ) præsentem non habueris. Tertiò, spera per beatam Virginem, quæ proxima Deo est, summam cum ipso vñionem. Quartò, gratias age beatæ Virginis, quod Deum à nobis maximè remotum ad nos attraxit. Quintò, pete ut te absolutè charitatis glutine Deo vniat, eius sequendo voluntatem.

*Quarta pars,*

## BENEDICTA TV IN MVLIERIBVS.

Primò, adora beatam Virginem benedictam, primò, in sanctis cogitationibus cordis; secundò, in linguae pijs verbis; tertio, in operibus ad diuinæ legis regulam consummatis; quartò, in animi demissione; quintò, in partu Redemptoris, à quo omnis benedictio in genus humanum deriuata, quibus benedictiōibus Euæ maledictiones destruxit, quæ præcesserunt primò, in eius cogitatâ defectiōne;

S 5 secun-

secundò, vocibus ad dæmonem perlatis; tertio, operibus diuino præcepto contrarijs; quartò, superbiâ Deo resistente; quintò, peccato ad posteros transmisso. Secundò, dole ob eas in quibus natus es maledictiones, primò spirituales, scilicet intelligentiam excusatam, voluntatem distortam, appetitiones effrenes, sensus depravatos: secundo corporales, scilicet morbos, egestatem, mortem. Tertiò, spera te omnem à Deo benedictionem per beatam Virginem impetraturum. Quartò, gratias age, quod in nos à Deo per beatam Virginem tamquam à capite per collum in corpus, multe benedictiones transfunduntur. Quintò, pete à beatâ Virgine, ut ab eius Filio iudicandus, audias cum electis, *Venite benedicti, &c.*

*Quinta pars, ET BENEDICTVS FRVCTVS  
VENTRIS TVI IESVS.*

Primò, adora beatam Virginem, quæ arbor est vita, & CHRISTVM IESVM arboris huius fructum, qui vita nostra est. Secundò, dole, quia animæ tuæ gustatui non est suavis fructus hic suauissimus, & dulciores tibi sunt terrenæ voluptates, quam cælestè hoc neclar. Tertiò, spera à beatâ Virgine animæ tuæ fecunditatem, & à fructu ventris eius, fructus vitæ æternæ. Quartò, gratias age B. Virginis,

quæ

quæ vera terra promissionis est, lacte & melle manans, pro fructu nobis producto. Quintò, pete fructum spiritualium, copiam & feracitatem longè maiorem.

## Sexta pars, SANCTA MARIA MATER DEI.

Primò, adora in B. Virgine supernam hanc diuinæ Matris dignitatem. Secundò, pudeat te vilitatis tuæ, coram hac supremâ Reginâ. Tertiò, spera, B. Virginem, quæ Deum effecit fratrem nostrum, te in filium accepturam. Quartò, gratias age B. Virgini, quia peperit nobis Redemptorem, & quia personam humanam ad infinitam diuinæ Matris dignitatem euexit. Quintò, pete à beatâ Virgine Dei Matre, ut te diuinæ voluntati obsequentem reddendo, filij sui quodammodo matrem faciat, dicente Domino: *Quicumque fecerit voluntatem Patris mei qui in cœlis est, ipse meus frater, & soror, & mater est.*

## Septima pars, ORA PRO NOBIS PECCATORIBVS, NVNC, ET IN HORA MORTIS NOSTRÆ. AMEN.

Primò, adora B. Virginem, quia Patrona nostrâ est, quia Dei hominumque conciliatrix, quia diuinorum beneficiorum impetratrix. Secundò, dole, quia ex tantæ Reginæ patrocinio nullum tu tuâ culpâ in te auxilium vtilita-

utilitatemque deriuas. Tertiò, spera te à Deo impetraturum, quidquid, B. Virgine causam tuam agente, à Deo petieris. Quartò, gratias age B. Virginis pro diligenti curâ, quâ nos protegit. Quintò, pete à B. Virgine MARIA, ut velit in suâ clientelâ esse status omnes, Ecclesiasticos & laicos, viuos & defunctos, affines, benefactores, persecutores, denique eos omnes, qui nostras exquirunt preces: secundò pete, ut impetrat nobis nostrorum erratorum veniam à Deo: tertio, diuinæ voluntati omnium hominum voluntates obsequentes reddat: quartò, ut vitæ extremo tempore præsens nobis esse velit. Dic nouies, *Beata viscera Mariae Virginis, quæ portauerunt, &c.* ad honorem nouem mensium, quibus Christum portauit; & nouem genuflexiones facias.

Visita septem templa dedicata B. Virginis.

Recita ter Ave, primum ad honorem instantis, quo sine peccato originali concepta; secundum ad honorem instantis, in quo facta est Mater Dei; tertium ad honorem illius instantis, in quo unita fuit Filio post mortem.

Actuare me sàpè in his actibus, velle me amare B. Virginem, etiam per totum Rosarium.

Affige imagini B. Virginis chartulam, in quâ scripta sit necessitas tua, cù aliquo dono.

*Ad*

*Ad Angelum Custodem.*

ANGELE sancte, Deo dilecte, qui me  
tuæ beatæ curæ ab ortu meo commis-  
sum, perpetuò protegis, illuminas, regis: ego  
te Patronum veneror, custodem amo, tuæ  
qué me deuotioni subijcio, ac prorsus trado  
gubernandum. A te ergo per IESVM CHRI-  
STVM peto suppliciter, vt me, quamuis ingra-  
tum, & contra tua monita agentem, ne de-  
seras: sed benignus errantem dirigas, igno-  
rantem erudias, iacentem erigas, afflictum  
soleris, periclitantem liberes, donec in cæ-  
lum ad eternam felicitatem perducas. Amen.

F I N I S.



S V M -